



Ni Presidente Thomas S. Monson

Nagungaren!

Ti awan nagyanna a tanem iti dayta nga umuna nga agsapa ti Paskua ti Panagungar ket sungbat iti saludsod ni Job, “No matay ti tao, agbiagto aya manen?”

Nakaskasdaaw daytoy a session. Iti nagan iti amin a nakiraman ngarud iti panagsarita wenno panagkanta, kas Presidente ti Simbaan, pinilik a sawen kadakayo iti daytoy a kanito ti maysa laeng a balikas, a maam-ammo a maysa a kapatgan a balikas iti Iloko. Ken ni Sister Cheryl Lant ken ti dua a mammagbagana, ti koro, dagiti nagtokar, dagiti nagsarita, dayta a balikas ket “Agyamanak.”

Adun a tawen ti napalabas, bayat ti kaaddak iti London, England, binisitak ti nalatak a Tate art gallery. Dagiti obra da Gainsborough, Rembrandt, Constable, ken dadduma pay a nalatak a pumipinta ket naipakita iti adu a kuarto. Dinaydayawko ti kinpintasda ken binigbigko ti kinalaing a kinasapulan tapno mapartuat dagitoy a napipintas nga aramid ti arte (masterpiece). Masarakaran iti naulimek a sulit ti maikatlo a kadsaaran, nupay kasta, ket ti maysa a naipinta

a ladawan a saan laeng a nakaawis iti imatangko no di ketdi pay nakaawis pay iti pusok. Ti pintor, a ni Frank Bramley, ket impintana ti maysa a nanumo a kalapaw a nakasango iti mayang-angin a baybay. Dua a babai, ti ina ken ti asawa ti maysa a napukaw a mangngalap, ket mangbuybuya ken agur-uray iti dayta unos ti rabii para iti panagsublina. Itan napalabasen dayta a rabii, ket naammuan ken naamirisdan a napukawen isuna iti baybay ket saanen a makasubli pay. Sipaparintumeng iti abay ti katuganganna a babai, a nakasadag ti ulona iti saklot ti baket, nagsangit ti ubing pay nga asawa a napukawanen iti namnama. Ipakita ti nauposen a kandela no kasano ti kabayag ti awan banag a panagur-urayda.

Nariknak ti sakit ti nakem ti asawa a babai; nariknak ti panagladingitna. Ti masansan a malagip nga inskripsion nga inted ti pintor iti obrana ket mangisalaysay iti estoria ti trahedia.

Ibasana daytoy, *Maysa nga Awan Namnamana a Parbangon*.

O, no kasano ti panagtarigagay ti ubing nga asawa a babai iti pannakalinglingay, kas met iti kinapudno ti “Requiem” ni Robert Louis Stevenson:

*Pagtaengan ti agbambaniaga iti taaw, pagtaengan manipud iti baybay,
Ken pagtaengan ti agan-anup,
pagtaengan manipud iti turod ken bantay.¹*

Kadagiti amin a kinapudno ti mortalidad wenno biag iti daga, awan ti makaammo iti paggibusana. Umay ti patay iti amin; daytoy ti “sangalubongan a tawidtayo; mabalinna nga alaen ti biktimana iti kinamaladaga wenno kinaagtutubo, [mabalinna ti bumisita] iti damdamo ti panagbiag, wenno mabalin a maitantan pay ti pannakapasamakan agingga a ti kinabaket wenno kinalakay ket paubanennan dagiti buok ti maysa a tao. Mabalin a mapasamak daytoy kas bunga ti aksidente wenno sakit, ... wenno ... babaen kadagiti natural a gapu; ngem nasken a dumteng ti ipapatay.”² Di maliklikan a mangibagi daytoy iti nasaem a pannakapukaw ti pannakilangen ken, nangnangruna kadagiti agtutubo, maysa a lapped wenno tubeng kadagiti saan pay a natungpal nga arapaap, saan pay a naragpat nga amibision, ken napaay a namnama.

No ania ti mortal a tao, a naipasango iti pannakapukaw ti maysa nga ipatpateg, wenno, kinapudnona,

mabighbigna nga isu ket nasken met a matay, saanna pay nga inutob no ania ti agur-uray iti sabali a biag a mangisina iti makita ken saan a makita?

Adun a siglo ti napalabas ni Job—a napaut a naparaburan iti amin a material a sagsagut, tapno laeng sagra-pen ti bagina ti nakaro a sakit ti amin a mabalin a mapasamak iti maysa a tao—katugawna dagiti kakaduana ket insawangna ti saan nga agbalbaliw, agnanayon a saludsod, “No matay ti tao, agbiagto aya manen?”³ Insao ni Job no ania ti inutoben ti tunggal sabali pay a sibibiag a lalaki ken babai.

“No matay ti tao, agbiagto aya manen?”—ket ikkak iti sungbat a sumangbay saan laeng nga aggapu iti napudno a kapanunotan no di ketdi pay naggapu iti naipalgak a balikas ti Apo. Rugiak kadagiti napapateg a banag.

No adda maysa a plano iti daytoy a lubong a pagnanaedantayo, nasken nga adda maysa nga Agar-aramid iti Plano. Asino ti makakita kadagiti adu a pagsisiddaawan ti lubong a saan a mamati nga adda maysa a plano para iti amin a sangkatawan? Asino ti makapagduadua nga adda maysa nga Agar-aramid iti Plano?

Iti libro ti Genesis masursurotayo a ti Naindaklan nga Agar-aramid iti Plano ket pinarsuana ti langit ken ti daga: “Ket ti daga, adda idi a gosogoso, ken awan nagan; ket dagiti sipnget addada idi iti rabaw ti yuyeng.”

“Adda koma lawag,” kinuna ti Naindaklan nga Agar-aramid iti Plano, “ket nagadda ti lawag.” Pinarsuana ti maysa a tangatang. Inlasinna ti daga manipud kadagiti

danum ket kinunana, “Patubuen koma ti daga ti ruot, ... kaykayo nga agbunga nga ti bukeln adda kadakuada kas iti kasisigudda.”

Pinarsuana ti dua a silaw—ti init ken ti bulan. Dimteng dagiti bituen babaen ti planona. Inawaganna dagiti sibibiag a parsua iti danum ken dagiti tumatayab nga agtayab iti ngato ti daga. Ket naaramid a kasta. Inaramidna dagiti baka, narungsot nga ayup, ken dagiti agkarkarayam a banag. Dumani malpas ti plano.

Ti kaudian ti amin, pinarsuana ti tao a kaladawanna wenno kaingingasn—lalaki ken babai—a mangituray iti isu amin a dadduma pay a sibibiag a parsua.⁴

Ti tao mismo ket nakaawat iti saririt—utek, panunot, ken kararua. Ti tao mismo, nga addaan kadagitoy a nasayaat a kababalin, ket addaan iti kabaelan para iti pammati ken namnama, para iti pammaregta ken ambision.

Asino ti sipipilit a makisinnupiat a ti tao—ti kangayedan nga aramid ti Naindaklan nga Agar-aramid iti Plano, a mangituray iti amin a sibibiag a parsua, nga addaan utek ken pakinakem, addaan iti panunot ken kararua, addaan iti saririt ken kina-diosan—ket nasken nga aggibus ti biagna no panawan ti espiritu ti mortal a bagi?

Tapno maawatan ti kaipapanan ti patay, nasken a maawatantayo ti panggep ti biag. Ti pammati laeng ket nasken nga agbunga iti dakdakkal a lawag a sumangbay babaen ti paltining, a pakaammuantayo a nagbiagtayo idin sakbay a naipasngaytayo iti mortalidad. Iti kasasaadtayo iti biag sakbay a nayanaktayo, datayo dagiti saan a managduadua kadagiti annak

ti Dios a nangipukkaw iti rag-o gapu iti gundaway nga umay iti daytoy ma-pannubok ngem kasapulan a mortal a panagbiag.⁵ Ammotayo idin a ti panggeptayo ket tapno manggunod iti pisikal a bagi, tapno mangpamek kadagiti pannubok, ken tapno paneknekan a tungpalentayo dagiti bilin ti Dios. Ammo ti Amatayo a gapu iti kasasaad ti mortalidad, masulisogtayo, agbasoltayo, ken mapaaytayo. Tapno maaddaantayo iti amin a gundaway nga agballigi, impaayannatayo iti maysa a Mangisalakan, nga agsagaba ken matay gapu kadatayo. Saan laeng a subbotenna dagiti basbasoltayo, ngem kas paset dayta a Pannubbot, maparmekna pay ti pisikal nga ipapatay a pakaisanguantayo gapu iti Pannakatnag ni Adan.

Ngarud, nasurok a 2,000 a tawen ti napalabas, naipasngay ni Cristo, ti Mangisalakantayo, iti mortal a biag iti maysa a kulluong iti Betlehem. Dimtengen ti nabayagen a naipadto a Mesias.

Bassit unay ti naisurat maipapan iti kinaubing ni Jesus. Paggugustok ti binatang manupid iti Lucas: “Ket ni Jesus dimmakel iti kinasirib ken kinatayag, ken ti gundaway ti Dios ken kadagiti tao.”⁶ Ken manipud iti libro ti Dagiti Aramid, adda ababa a binatang maipanggep iti Mangisalakan a napnuan iti kaipapananna: “[Isu] a namagpagna a nagar-aramid iti naimbag.”⁷

Binuniagan isuna ni Juan iti karayan Jordan. Inawaganna dagiti Sangapulo-ket-dua nga Apostol. Binendisionanna dagiti masakit. Pinagbalinna a makapagna dagiti pilay, makakita dagiti bulsek, makangngeg dagiti tuleng. Pinagungarna pay

dagiti natay. Nagisuro, nagpaneknek, ken nangted iti naan-anay a pagwadan a tuladentayo.

Ket kalpasanna asidegen a malpas ti mortal a mision ti Mangisalakan ti lubong. Naaramid ti maudi a pangrabii a kaduana dagiti Apostolna iti akinngato a siled. Iti sibay adda ti Getsemani ken krus ti kalbario.

Awan ti tao laeng a makaawat iti naan-anay a kinapateg ti inaramid ti Dios para kadayo iti Getsemani. Isu Mismo ti nangiladawan iti padasna: “[Ti] panagsagaba nangipaay kaniak, uray pay ti Dios, a kaindaklan iti amin, nga aggarigenggen gapu iti saem, ken agdara iti tunggal teterreman, ken agsagaba nga agpada ti bagi ken ti espiritu.”⁸

Kalpasan ti panagsagabana iti Getsemani, ita awanen pigsana, tiniliw isuna dagiti natangsit ken naulpit nga ima ket naidatag iti sango da Anas, Caifas, Pilato, ken Herodes. Napabasol ken nailunod isuna. Dagiti naranggas a danog ket ad-adda manen a nangpakapsut iti nasapsaplit a bagina. Nagayus ti dara iti rupana bayat ti naipuersa a pannakabalangat ti ulona kadagiti natirad a siit, a bimmaon iti kidayna. Ket kalpasanna naidatag manen isuna ken ni Pilato, a nangpatgan kadagiti kiddaw ti makagura a bunggoy: “Pailansam, pailansam iti krus.”⁹

Nasaplit isuna iti maysa a pannaplit a dagiti adu a nginabras a lalat daytoy ket pangpatadem kadagiti metal ken tulang ket naya-bel. Iti panagtakderna manipud iti kinaulpit ti saplit, nga agpigsopisolid dagiti addangna binaklayna ti bukodna a krus agingga a saannan a kabaelan ti magna pay ket

imbaklay ti sabali a tao ti awit para Kenkuana.

Iti kamaudiananna, iti maysa a turod a naawagan iti Kalbario, idinto a kumitkita dagiti awan gawayna a pasurot, nailansa iti krus ti nadunor a bagina. Siaawan asi nga Isu ket nauyaw ken nailunod ken naumsi. Ngem nupay kasta impukkawna, “Ama, pakawanem ida; ta dida ammo ti ar-aramidenda.”¹⁰

Naglabas dagiti oras ti panagrigrigatna bayat ti asidegen nga ipapatayna. Manipud kadagiti namagaanen a bibigna, insawangna dagiti balikas, “Ama, kadagita imam ti pangitalkak itoy kararuak: ket idi a nasaonan, nauyosanen.”¹¹

Bayat ti panakawayawaya Kenkuana ti talna ken liwliwa ti nainkaasian nga ipapatay manipud kadagiti kinaladingit ti biag ti daga wenno mortalidad, nagsublin isuna iti sidong ti Amana.

Iti maudi a kanito, mabalin koma ti Maestro ti agsubli. Ngem saanna nga inaramid. Impasangona ti bagina a sibababa iti amin a banag tapno maisalakanna ti amin a banag. Sidadaras ngem siaannad a naipan ti awan biag a bagina iti nabulod a tanem.

Awan dagiti balikas iti nasantuan a kasuratan ti Kristiano nga ad-adda ti kaipapananna kaniak ngem kadagiti imbaga ti anghel iti agsangsangit a Maria Magdalena ken ti sabali pay a Maria idi, iti umuna nga aldaw ti lawas, inasitganda ti tanem tapno asikasuenda ti bangkay ti Apoda. Kinuna ti anghel:

“Apayapay sapulenyu kadagiti natay ti sibibiag?”

“Awan ditoy, no di ket nangungaren.”¹²

Nagbiag manen ti Mangisalakantayo. Napasamaken ti kangrunaan a nagloriaan, makalinglingay, ken manamnama iti amin a pagteng iti pakasaritaan ti tao—ti panagballigi ken ni patay. Nagawanen ti saem ken panagsagaba iti Getsemani ken Kalbario. Natalgeden ti pannakaisalakan ti sangkatawan. Naako manen ti Pannakatnag ni Adan.

Ti awan nagyanna a tanem iti dayta nga umuna nga agsapa ti Paskua ti Panagungar ket sungbat iti saludsod ni Job, “No matay ti tao, agbiagto aya manen?” Iti amin a makangngeg iti timekko, kunak, No matay ti tao, agbiagto manen. Ammotayo, gapu ta addaantayo iti silaw ti naipalgak a kinapudno.

“Ta yantangay gapu iti tao immay ni patay, gapu iti tao, umay met ti panagungar dagiti natay.

“Ta kas matayda amin ken Adan, kasta met mabiagdanto amin ken Cristo.”¹³

Nabasakon—ket patiek—dagiti pammaneknek dagitay nakapadasen iti kinaladingit ti Pannakailansa ni Cristo iti krus ken ti rag-o ti Panagungarna. Nabasakon—ket patiek—dagiti pammaneknek dagitay adda iti Baro a Lubong a sinarungkaran ti isu met la a nangungar nga Apo.

Patiek ti pammaneknek ti maysa nga, iti daytoy a dispensasion, nakisarita iti Ama ken iti Anak iti kakaywan a maawagan itan iti sagrado ken isu a nangipaay iti biagna, a nangiseliho iti pammaneknekna iti darana. Insawangna:

“Ket ita, kalpasan ti adu a pammaneknek a naipaay kenkuana, daytoy ti pammaneknek, a maudi

ti amin, nga ipaaymi kenkuana: A sibibiag!

“Ta nakitami, uray iti makawan ti Dios; ket nangngemgi ti timek a mangpaneknek nga Isu ti Bugbugtong ti Ama.”¹⁴

Ti kinalidem ni patay ket mabalin a kanayon nga iwaksi ti silaw ti nainpalgak a kinapudno. “siak ti panagun- ngar, ken ti biag,” kinuna ti Maestro.¹⁵ “Ti talna ibatik kadakayo, ti talna it- dek kadakayo.”¹⁶

Iti adu a tawen nangngagak ken nabasakon dagiti di mabilang a pammaneknek, nga imburay kaniak dagiti tao a nagipaneknek maipapan iti kinapudno ti Panagungar ken immawatdan, kadagiti panawen ti nakaro a panagkasapulanda, iti talna ken liwliwa nga inkari ti Mangisalikan.

Dakamatek ti sangapaset laeng ti maysa a kasta a pakaammuan. Dua a lawas ti napalabas immawatak iti makatignay rikna a surat a naggapu iti maysa nga ama ti pito a nagsurat maipanggep iti pamiliana ken, kangrunaanna, ti anakna a ni Jason, a nagbalin a masaksakit idi agtawen iti 11. Kadagiti sumaruno a sumagmamano a tawen, namin-adu a nagsublisubli ti sakit ni Jason. Insarita daytoy nga ama ti nasayaat a kabalalin ken naragsak nga ugali ni Jason, iti baet dagiti pannubokna iti salun-at. Inawat ni Jason ti Aaronic Priesthood idi agtawen iti 12 ken “kanayon a siaayat a nangaramid a naimbag kadagiti pagrebbenganna nga addaan iti kinalaing, masakit man wenno saan.” Inawatna ti Eagle Scout Awardna idi 14 ti tawenna.

Itay kallabes a kalgaw, saan unay a nabayag kalpasan ti maika-15 a

kasangay ni Jason, naiserrek manen isuna iti ospital. Iti maysa kadagiti isasarungkar ti amana tapno mangkita ken ni Jason, natakuatanna a nakakidem dagiti matana. Iti saanna a pannakaammo no matmaturog wenno siririing ni Jason, rinugianna ti nagsarita a silalanay kenkuana. “Jason,” kinunana, Ammok adun ti nagpasaram a rigat iti ababa a biagmo ken narigat ti agdama a kasasaadmo. Nupay adda dakkel a ranget nga agur-uray kenka, diak kayat iti kaano man a mapukawmo ti pammatim ken ni Jesucristo” Kinunana a nasdaaw idi dagus a nagmulagat ni Jason ket kinunana, “Diak kaano man!” iti nalawag ken natibker a timek. Kalpasanna nagkidemen ni Jason ket saanen a nagsao pay.

Insurat ti amana: “Iti daytoy simple a palawag, inyebkas ni Jason ti maysa kadagiti kabilgan, katarnawan a pammaneknek ni Jesucristo a nangngagak.... Bayat ti pannakaimaldit iti kararuak ti panangisawangna iti ‘Diak kaano man!’ iti dayta nga aldaw, napnuan ti pusok iti rag-o ta pinaraburannak ti Nailangitan nga Amak tapno agbalinak nga ama ti kasta a nakaskasdaaw ken natakneng nga ubing a lalaki.... [Daytoy] ti maudi a gundaway a nangngagak isuna a nangisawang iti pammaneknekna maipapan ken ni Cristo.”

Nupay ninamnama ti pamiliana daytoy a gagangay laeng a pannakaospital, pimmasay ni Jason iti kurang a dua a lawas kalpasanna. Agserserbi iti mision ti manongna ken manangna iti dayta a panawen. Sabali pay a manongna, ni Kyle, ket kaaw-awatna laeng ti awagna nga

agmision. Kinapudnona, dimteng ti awag a nasapsapa ngem iti ninamnama, ket idi maika-5 ti Agosto, makalawas laeng sakbay ti ipupusay ni Jason, naguummong ti familia iti silid ti ospital tapno madakamat idiy ti awag iti mision ni Kyle ket maiburay iti sangapamiliaan.

Iti suratna kaniak, inraman a nakaidda iti katrena iti ospital, a kaduana ni manongna a Kyle a nakatakder iti abay ti katrena, a mangig-iggem iti awagna nga agmision. Naisurat daytoy iti baba ti retrato: “Naawaganda nga agpada nga agserbi kadagiti misionda—iti agsumbangir a biag.”

Ti manong ken manang ni Jason nga agserserbin iti mision ket nangipatulodda iti napintas, makalinglingay a surat iti pagtaengan a naibasa idi maipumpon ni Jason. Ni manangna, nga agserserbi iti Argentina Buenos Aires West Mission, kas paset ti suratna, kinunana: “Ammok a sibibiag ni Jesucristo, ket gapu ta sibibiag, agbiagtayonto met amin, agraman ti patpatgenmi a ni Jason.... Maliwliwakami iti awan duadua a pannakaammo nga adda kada kami a nailantipkamin a sangkamaysa a kas agnanayon a familia.... No aramidenmi ti amin a kabaelanmi nga agtungpal ken agaramid iti nasaysayaat iti daytoy a biag, makitaminto [isuna manen].” Intuloyna: “[Maysa] a nasantuan a kasuratan a nabayagen a paggugustok ket mangted iti baro a kaipapanan ken pateg iti daytoy a gundaway.... [Manipud iti] Apocalipsis maika-21 a kapitulo, bersikulo 4: ‘Ket punasento [ti Dios] ti amin a lulua kadagiti matada; ket awanton ni patay,

ket awanto metten ti sasaibbek,
wenno sangsangit, wenno rigrigat:
ta dagidi immuna a bambanag
napalabasdan.”

Patpatgek a kakabsatko, iti
oras ti napalaus a panagladingittayo,
mabalintayo ti umawat iti narimbaw
a talna manipud kadagiti balikas ti
anghel iti dayta nga umuna nga ag-
sapa ti Paskua ti Panagungar: “Awan
ditoy: ta nagungaren.”¹⁷

*Nagungaren! Nagungaren!
Ipakaammotay a sirarag-o.*

*Rimmuar iti tanem tallo nga
aldaw.
Agrag-o koma ti sapa a lubong
Naparmeken ti patay; nawayan
ti tao.
Nagballigin ni Jesus!*¹⁸

Kas maysa kadagiti naisangsa-
ngayan a saksi iti daga ita, daytoy
nagloriaan a Domingo ti Paskua
ti Panagungar, ipakdaarko a
pudno daytoy, iti sagrado a nagan-
na—kas iti nagan ni Jesucristo,
ti Mangisalakantayo—amen.

DAGITI NAGADAWAN

1. Robert Louis Stevenson, “Requiem,”
iti *An Anthology of Modern Verse*,
ed. A. Methuen (1921), 208.
2. James E. Talmage, *Jesus the Christ*,
3rd ed. (1916), 20.
3. Job 14:14.
4. Kitaen iti Genesis 1:1–27.
5. Kitaen iti Job 38:7.
6. Lucas 2:52.
7. Dagiti Aramid 10:38.
8. Doktrina ken Katulagan 19:18.
9. Lucas 23:21.
10. Lucas 23:34.
11. Lucas 23:46.
12. Lucas 24:5–6.
13. 1 Taga-Corinto 15:21–22.
14. Doktrina ken Katulagan 76:22–23.
15. Juan 11:25.
16. Juan 14:27.
17. Mateo 28:6.
18. “He Is Risen!” *Hymns*, no. 199.

Dagiti Pannursuro para iti Panawentayo

Dagiti adalen iti Melchizedek Priesthood ken Relief Society kadagiti maikapat a Domingo ket maipaayto iti “Dagiti Pannursuro para iti Panawentayo.” Mabalin a maisagana ti tunggal adalen manipud iti maysa wenno add-adu pay a bitla a naited iti kallabes unay a sapasap a komperensia. Mabalin a pilien dagiti stake ken district president no ania dagiti bitla ti masapul a maaramat, wenno mabalinda nga idutok daytoy a pagrebbengan kadagiti bishop ken branch president. Masapul a unay-unay dagiti dadaulo ti pateg dagiti kakabsat iti Melchizedek Priesthood ken Relief Society nga agad-adal kadagiti agpada a bitla kadagiti isu met la a Domingo.

Maallukoy dagiti dumardar-ay kadagiti adalen iti maikapat a Domingo tapno agadal ken itugotda iti klase ti kaudian nga isyu ti magasin iti sapasap a komperensia.

Dagiti Singasing para iti Panangisagana iti maysa nga Adalen manipud kadagiti Bitla

Agkararag tapno agnaed kenka ti Nasantuan nga Espiritu bayat ti panagadalmo ken panangisurong (kadagiti) bitla. Mabalin a masulisogka a mangisagana

iti adalen nga usarem dagiti sabali a material, ngem dagiti bitla ti komperensia ti naanamongan a kurikulum. Ti naituding nga aramidem ket tulongam dagiti dadduma nga agsursuro ken agtungpal iti ebanghelio kas naisuro iti kaudian a sapasap a komperensia ti Simbaan.

Sublien nga adalen (dagiti) bitla, a sapulen dagiti pagbatayan ken doktrina a mangted kadagiiti kasapulan dagiti miembro ti klase. Kasta met a sapulen dagiti estoria, reperensia ti nasantuan a kasuratan, ken palawag manipud (kadagiti) bitla a mangtulongto kenka a mangisuro kadagitoy a kinapudno.

Agaramid iti maysa a balabala [outline] ti no kasano ti panangisuro kadagiti pagbatayan ken doktrina. Masapul a mairaman iti balabalam dagiti saludsod a mangtulong kadagiti miembro ti klase:

- Sapulen dagiti pagbatayan ken doktrina (kadagiti) bitla.
- Panunoten maipapan iti kaipapananda.
- Iburay ti pannakaawat, dagiti kapanunotan, padpadas, ken pammaneknek.
- Yaplikar dagitoy a pagbatayan ken doktrina iti biagda.

DAGITI BULAN	DAGITI MATERIAL NGA ADALEN ITI MAIKAPAT A DOMINGO
Mayo 2010– Oktubre 2010	Dagiti bitla a naipablaak iti Mayo 2010 <i>Liahona</i> *
Nobiembre 2010– Abril 2011	Dagiti bitla a naipablaak iti Nobiembre 2010 <i>Liahona</i> *

*Sidadaan a magun-od dagitoy a bitla iti (adu a lengguabe) iti conference.lds.org.



Ni Presidente Henry B. Eyring

Umuna a Mammagbaga iti Umuna a Panguluon

Tulongan Ida iti Dalanda nga Agawid iti Nailangitan a Pagtaengan

Kasayaatan a matulongantayo dagiti annak ti Dios babaen ti panangipaay kadagiti wagas a mangbuangay iti pammati ken ni Jesucristo ken iti naisubli nga ebangheliona no ubbingda pay laeng.

Kakabsatko, kayat ken kasapul-an ti Nailangitan nga Amatayo ti tulongtayo a mangyawid kadagiti espiritu nga annakna manen Kenkuana. Agsaritaak ita maipapan kadagiti agtutubo nga addan iti uneg ti pudno a Simbaan ken magrugidan a magna iti naillet ken akikid a dalan tapno agsublida iti nailangitan a pagtaenganda. Kayatna ida a makagun-od a nasapa iti naespirituan a pigsa tapno agtalinaedda iti dana. Ket kasapulanna ti tulongtayo a mangisubli a madagdagus kada-kuada iti dana no mangrugidan a mayaw-awan.

Maysaak a kabarbaro a bishop idi narugiak a makita a silalawag no apay a kayat ti Apo a papigsaentayo dagiti annak no ubbingda pay ket ispalenta-yo ida a madagdagus. Isaritak kada-kayo ti maysa nga estoria maipapan iti maysa nga agtutubo a mangibagi iti kaaduan a napadaskon a tulongan iti adun a tawen.

Nagtugaw isuna a kasangok iti lamisaanko iti opisinak a kas bishop. Insaritana kaniak maipapan iti biagna. Isu ket nabuniagan ken nakompirmaan a kas miembro ti Simbaan idi agtawen ti walo. Awan ti lua dagiti matana bayat ti panangisalaysayna

iti sumaruno a nasurok a 20 a tawen, ngem adda liday iti timekna. Kinunana a nangrugi ti dalanna iti basol kadagiti pili a makipulapol kadagiti tao nga impagarupna a makaay-ayo a tattao. Nangrugi a linabsingna dagiti, idi damona ket kasla saanda a napateg a bilin.

Narikhana idi damo ti bassit a liday ken sangkabassit a basol. Ngem dagiti pannakipulapolna kadagiti gayyemna ti nangipaay kenkuana iti baro a rikna ti pannakagusto, ket iti kasta kasla saanen a napateg dagiti masansan a planona a mangbalbaliw iti ugalina tapno makapagbabawi. Bayat ti dumakdakkal a pateg dagiti bilin a lablabsingenna, kasla naawanen ti arapaap iti maysa a naragsak nga agnanayon a pagtaengan.

Nagtugaw iti sangok a nagisarita iti inawaganna a kinarigat. Kayatna nga ispalek isuna manipud iti palabog ti basol a nakatakuatanna iti bagina a nakapungo. Ngem ti laeng dalan a makaruar ket ti panangusarna iti pammatina ken ni Jesucristo, maaddaan iti agbababawi a puso, agbabawi, ket iti kasta madalusan, nagbalbaliw, ken napapigsa babaen ti Pannubbot ti Apo. Imburayko ti pammaneknekkko kenkuana a posible pay laeng daytoy. Ket kasta ngarud, ngem narigrigat nga amang ngem idi inusarna koma ti pammatina idi ubing pay iti panagdaliasatna nga agawid iti Dios ken idi damona a mangrugi a mayaw-awan.

Iti kasta kasayaatan a matulongantayo dagiti annak ti Dios babaen ti panangipaay kadakuada kadagiti wagas a mangbuangay iti pammati ken ni Jesucristo ken ti naisubli nga

ebangheliona no ubbingda pay. Ket kalpasanna nasken a tumulongtayo a mangsindi manen a madagdagus iti dayta a pammati sakbay nga aglidem daytoy bayat ti pannakayaw-awanda nga umadayo iti dana.

Iti kasta makanamnamakayo ken makanamnamaak iti dumani agtultuloy a gundaway a mangtulong kadagiti agbambaniaga a kabilang dagiti annak ti Dios. Imbaga kadayo ti Mangisalakana no apay a posible dayta idi inladawanna ti napeggad a panagdaliasat nga agawid ti amin nga espiritu nga annak ti Dios iti baet dagiti angep a parnuayen ti basol ken ni Satanas:

“Sumrekkayo iti ruangan a naillet ta akaba ti ruangan ken nalawa a dalan ti mangiturong iti pakadadaelan, ket adu dagiti simrek idiy;

“Ta naillet ti ruangan ket akikid ti dalan nga agturong iti biag ket bassit dagiti makasarak itoy.”¹

Iti nasaksakbay a pannakakitana kadagiti kasapulan dagiti annakna, nangikabil ti managayat a nailangitan nga ama kadagiti pangiturong ken mangispal iti dalanda. Imbaonna ti Anakna, ni Jesucristo, tapno mangaramid iti natalged a pagnaan a posible ken makita. Inawaganna a kas propetana kadagitoy a panawen ni Presidente Thomas S. Monson. Manipud pay iti kinaagtutubona insuron ni Presidente Monson saan laeng ti no kasano ti agtalinaed iti dana ngem ketdi insurona pay ti no kasano ti mangispal kadagitay nayaw-awanen nga agturong iti panagleddaang.

Impannatayo ti Nailangitan nga Ama iti nadumaduma a kasasaad

tapno mangpapigsa ken, no kasapulan, tapno mangiturongtayo kadagiti agdaldaliasat iti kinatalged. Dagiti kapatgan ken kabilgan a naituding nga aramidentayo ket iti pamilia. Napategda gapu ta adda gundaway ti pamilia iti rugi ti panagbiag ti maysa nga ubing tapno sititibker nga ikabilna dagiti sakana iti dalanna nga agawid. Dagiti nagannak, kakabsat a lallaki ken babbai, lelang ken lelong, iikit ken uuliteg ket naaramidda a nabilbileg a tarabay ken agis-ispal babaen dagiti begkes ti ayat a mangted kaipapanan iti pudno a kinatao ti pamilia.

Adda gundaway ti pamilia iti umuna a walo a tawen iti biag ti ubing. Kadagita a natatalged a tawen, gapu iti Pannubbot ni Jesucristo, saan a kabaelan nga usaren ni Satanas ti nangisit nga angep tapno ilemmengna ti dana nga agsubli iti nailangitan a pagtaengan. Kadagita a napapateg a tawen tulongan ti Apo dagiti pamilia babaen ti panangawagna kadagiti Primary worker tapno tumulongda a mangpapigsa iti kinaespirituan dagiti ubbing. Impaayna pay dagiti agik-ikut iti Aaronic Priesthood tapno mangidiaya iti sakramento. Kadagita a kararag iti sakramento, mangngegan dagiti ubbing ti kari a mabalindanto nga awaten iti maysa nga aldaw ti Espiritu Santo a kas pannarabay no natulnogda kadagiti bilin ti Dios. Kas bungana, mapatibkerdanto a mangliklik iti sulisog no sumangbay daytoy ket kalpasanna, iti maysa nga aldaw iti masakbayan, mapanda mangispal kadagiti dadduma pay.

Adu a bishop iti Simbaan ti napa-regta a mangawag kadagiti kapigsaan a tattao iti ward tapno agserbida kadagiti ubbing iti Primary. Maamirisdan a no mapapigsa dagiti ubbing iti pammati ken pammaneknekda, saanda unay a kasapulanto ti pannakaispal inton agtutuboda. Maamirisdan a ti napigsa a naespirituan a pundasion ket makaaramid iti pagdumaan iti unos ti panagbiag.

Makatulongtayo amin. Makatulong dagiti lelang, lelong, ken tunggal miembro a makaammo iti maysa nga ubing. Saan a nasken a maaddaanka iti pormal a takem iti Primary. Wenno limitado daytoy iti edad. Maysa a kasta a babai, agtutubo, ket adda iti Primary general board a timmulong a nangpartuat iti pagsasao ti CTR.

Saan a pulos nabannog iti panagserbina kadagiti ubbing. Nangisuro iti Primary iti wardna, iti kiddawna mismo, agingga idi dumani 90 ti tawenna. Narikna dagiti babassit nga ubbing ti ayatna para kadakuada. Nakitada ti pagwadanna. Nasursuroda kenkuana dagiti simple a pagbatayan ti ebanghelio ni Jesucristo. Ket kangrunaan ti amin, gapu iti pagwadanna a nasursuroda a nagrikna ken nangbigbig iti impluensia ti Espiritu Santo. Ket idi inaramidda, nangrugida a manggun-od iti pammati a kasapulanda a mangkedked iti suli-sog. Saandanto unayen a kasapulan a maispal ket makapagsaganada a mapan mangispal kadagiti dadduma pay.

Nasursurok ti bileg ti simple a pammati iti kararag ken iti Espiritu

Santo idi babassit pay dagiti annakmi. Saan pay idi a nabuniagan ti inauna a baromi. Dagiti dadakkelnan, mannursorona iti Primary, ken dagiti katulongan iti priesthood ket inkarigatanda a tinulongan isuna a makarikna ken makabigbig iti Espiritu ken mangammo no kasano ti panangawat iti tulongna.

Maysa a malem intulod ti asawak isuna iti pagtaengan ti maysa a babai a mangisursuro kenkuana nga agbasa. Planomi nga innakto alaen isuna iti dalanko nga agawid manipud iti pagtrabahuak.

Nasapsapa a nalpas ti leksionnan ngem iti ninamnamami. Nakarikna iti panagtakek nga ammona ti dalanna nga agawid. Isu a nangrugi a nagana. Kinunana kalpasanna nga adda naan-anay a panagtalekna ket kayatna ti agmaymaysa iti biahe. Kalpasan a nakapanaw iti kagudua ti milia (0.8 a kilometro), nangrugi a sumipngeten. Nariknana nga adayo pay laeng isuna iti pagtaenganda.

Malagipna pay laeng a pinakudrep dagiti luana dagiti silaw dagiti kotse bayat ti ilalabas dagitoy kenkuana. Nariknana a kasla bassit nga ubing, saanen nga isu ti managtalek nga ubing a lalaki a nangrugi a magna nga agmaymaysa nga agawid. Naamirisna a kasapulanna ti tulong. Kalpasanna adda maysa a banag a nalagipna. Ammona a nasken nga agkararag. Ket ngarud pinanawanna ti kalsada ket nagtutrong iti sumagmamano a kakaywan a dumani dina makitan iti kasipngetan. Nakasarak iti maysa a lugar a nagparintumenganna.

Kadagiti kaykayo nakangngeg

isuna kadagiti timek nga umas-asideg kenkuana. Dua nga agtutubo ti nakangngeg iti panangsangangitna. Bayat ti yaasidegda, kinunada, “Mabalindaka kad a tulongan?” Agsangangit nga imbagana kadakuada a nayaw-awan isuna ket kayatnan ti agawid. Dinamagda no ammona ti numero ti teleponona wenno adres. Saanna nga ammo. Dinamagda ti nanganna, Ammona. Kinuyogda isuna iti lugar nga asideg iti pagnaedanda. Nasarakanda ti apeliyadomi iti maysa a *phonebook*.

Idi naawatko ti awag iti telepono, nagdardarasak a napan mangispal, agyamanak ta nangipan ti Dios kadagiti nasayaat a tattao a nangkuyog kenkuana iti dalanna nga agawid. Ket kanayon a pangyamyamanak gapu ta nasursuruan nga agkararag a sipapammati tapno umay koma ti tulong iti napukaw isuna. Dayta a pammati ti nangiturong kenkuana iti talged ken nangyeg kenkuana iti adadu pay nga agis-ispal ken adadu pay a panawen ngem iti mabilangna.

Nagikabil ti Dios iti pasgtuladan ti panagispal ken dagiti agis-ispal iti pagarianna. Iti siribna pinaregta ti Apo dagiti katulonganna a mangikabil iti sumagmamano kadagiti kabilgan a wagas a mangpapigsa kadatayo ken mangilugar kadagiti kasayaatan nga agis-ispal bayat ti pananglabastayo kadagiti tawen ti kinaagtutubo.

Ammoyo ti maipapan iti dua a programa nga impaay ti Apo. Maysa, para kadagiti agtutubo a babbai, ket maawagan iti Bukod a Panagduras. Ti sabali pay, para kadagiti Aaronic Priesthood holder, ket maawagan iti

Pagrebengan iti Dios. Allukoyenmi dagiti agtutubo iti daytoy a tumantanor a kaputotan a kitaenda ti bukodda a potensial a mangbuangayda iti naespirituan a pigsan. Bayat ti panagpakaasimi kadagiti maseknan maipapan kadagita nga agtutubo tapno aramidentayo dagiti banag a kiniddaw ti Apo kadatayo a mangtulong kadakuada. Ket gapu ta agpannuray ti masakbayan ti Simbaan kadakuada, maseknantayo amin.

Napapintasen ti dua a programa, ngem agtalinaed nga awan nagbalbaliwana dagiti panggepda. Kastoy ti kinuna ni Presidente Monson: nasken a “masursurotayo ti masapul a sursuruentayo, maaramid ti masapul nga aramidentayo, ken agbalintayo iti masapul a pagbalinantayo.”²

Ti buklet a *Bukod a Panagduras* para kadagiti agtutubo a babbai ket mangilawlawag iti panggep para kadakuada: “Ti programa ti Bukod a Panagduras ket usarenna ti walo nga ik-ikkan pateg ti Young Women a pangtulong kadakayo iti pannakaawat a naan-anay no asinoka, no apay nga addaka iti daga, ken no ania ti nasken nga aramidem kas maysa nga anak a babai ti Dios tapno agsagana para iti aldaw nga ipapanmo iti templo tapno agaramid kadagiti sagrado a katulagan.”

Ituloyna a sawen a dagiti agtutubo a babbai ket “agaramid kadagiti panagkumit, ipatungpal dagitoy, ket ireport ti panagdurasyo iti maysa a naganak wenno lider.” Ikari pay daytoy a “dagiti pagtuladan nga ipasdekyo bayat ti panangitrabahoyoy iti Bukod a Panagduras—kas iti

kararag, panagadal iti nasantuan a kasuratan, panagserbi, ken panangsurat iti diurnal—ket agbalin nga aginaldaw a bukod nga ugali. Dagitoy nga ugali ti mangpapigsanto iti panmaneknekmo ken tulongandakayto nga agsursuro ken dumur-as iti unos ti biagyo.”³

Ti programa a Pagrebbengan iti Dios para kadagiti agtutubo a lallaki iti Aaronic Priesthood ket napapigsan ken naaramid a simple. Mailaonto daytoy iti maysa a simple a libro para iti amin a tallo a takem ti Aaronic Priesthood. Umawatto dagiti agtutubo a lallaki ken dagiti liderda iti maysa a kopia daytoy baro a libro. Nabileg daytoy a ramit. Papigsanna dagiti pammaneknek dagiti agtutubo a lallaki ken ti relasionda iti Dios. Daytoyto ti mangtulong kadakuada nga agsursuro ken agtarigagay a mangipatungpal kadagiti pagrebbenganda iti priesthood. Daytoyto ti mangpapigsa kadagiti relasionda iti nagannak kadakuada, kadagiti miembro ti korum, ken kadagiti liderda.

Agpada dagitoy a programa a mangted iti dakkal a pagrebbengan kadagiti aramid dagiti agtutubo mismo. Maawisda nga agsursuro ken agaramid kadagiti banag a makapakarrit wenna mapannubok para iti asino man. Bayat ti panangutobko iti kinaagtutubok, diak malagip a naaddaanak kadagiti kasta a narigat a karit. O, iti sumagmamano a gundaway naawisak a manggun-od kadagita kasta a narigat a karit, ngem sagpaminsan. Mangnamnama dagitoy a programa iti panagtutunos, dakkal

a panagkagumaan, ken ti pannakagun-od kadagiti padas iti panagsursuro ken naespirituan a padas iti adu a tawen.

Idi pinanunotko maipapan iti daytoy, naamirisko a dagiti linaon dagitoy a buklet ket pisikal a panangibagi ti panagtalek ti Apo iti tumantanor a kaputotan ken iti amin kadatayo a mangipatpateg kadakuada. Ken nakitakon ti pakakitaan a naikabil a nasa-yaat ti panagtalek.

Kadagiti isasarungkarko, nakitak ti panagtignay dagiti korum ti Aaronic Priesthood. Nakitak dagiti agtutubo a lallaki a mangsursurot kadagiti pagtuladan ti panagsursuro, agar-aramid kadagiti plano nga aramid no ania ti kayat ti Dios nga aramidenda, kalpasanna napanda nga agaramid iti inkumitda nga aramid ken nagisalaysayda kadagiti dadduma maipapan no kasano a nakapagbaliwda a naespirituan. Ken bayat ti panagbuyak ken panagdengngegko, nagbalin a nalawag a dagiti amma, inna, dadaulo, gagayem, ken uray pay dagiti kaarruba iti maysa a taripong ket sagiden ti Espiritu bayat ti idedengngegda iti panagpaneknek dagiti agtutubo maipapan iti no kasano a napapigsada. Naparegta dagiti agtutubo bayat ti panangiburayda iti pammaneknek, kasta met kadagiti mangpadpadas a mangtulong kadakuada a dumur-as.

Ti programa ti Young Women ket addaan met ditoy iti isu met la a nabileg a pagtuladan a mangpadur-as iti naespirituan a pigsang kadagiti agtutubo a babai ken mangted iti gundaway kadatayo tapno makatulong.

Tumulong ti Bukod a Panagduras kadagiti agtutubo a babai a makapagsaganada nga umawat kadagiti ordinansa ti templo. Matulonganda babaen kadagiti pagwadan dagiti inna, lelang, ken ti tunggal nalinteg a babai iti aglawlawda iti Simbaan. Nakitakon no kasano a tinulongan dagiti inna ti anakda a babai a makagun-od kadagiti panggepna a tun-oyen ken arapaap babaen ti panangkita ken panangbigbigna iti pateg ti amin a nasayaat nga ar-aramidenna.

Sumagmamano nga aldaw laeng ti napalabas binuyak ti maysa nga ina a nagtakder a kaabay ti balasitang nga anakna bayat ti yaawatda iti pammigbig gapu iti panagkaduada a nagbalin a pagwadan ti nalaing a kinababai. Ket kalpasan ti panagibagada kaniak no ania ti kaipapanan daytoy kadakuada, nariknak ti yaanamong ken panangallukoy ti Mangisalaman para kadatayo amin.

Ti amin a tulong a mabalintayo nga ited kadagitoy nga agtutubo, ti kadaklanto ket ti mangiparikna kadakuada ti panagtalek nga addada iti dalan nga agawid iti nailangitan a pagtaenganda iti Dios ken kabaelan- da nga aramidenda daytoy. Ket aramidenda ti amin a kabaellantayo babaen ti panangkaduatayo kadakuada iti ipapanda. Gapu ta narangkis ti dana ken nabato pay no dadduma, mariknada sagpaminsan ti pannakapay ken uray pay maidalebda. No dadduma mabalina a matikawda maipapan kadagiti pagturonanda ket mayaw-awanda iti panagsapsapulda kadagiti panggep a tun-oyen nga

awan agnanayon a kinapategna. Dagitoy a naparegta a programa ti mangipanamna gapu ta iturong-danto dagiti agtutubo tapno mangawis ken magawat iti panangkadkadua ti Espiritu Santo.

Ti kasayaatan a pammagbaga para kadayo a maited para kadagiti agtutubo ket ti makasublida manen iti Nailangitan nga Ama laeng no matarabay ken maaturda babaen ti Espiritu ti Dios. Isu a no masiribta-yo, paregtaentayo, dayawentayo ken ipagwadantayo ti amin a makaawis iti pannarabay ti Espiritu Santo. No iburayda kadayo no ania ti ar-aramiden ken mariknada, datayo met ket nasken a maikari para iti pannarabay ti Espiritu. Ngarud mariknada babaen ti pammadayaw ken isemtayo ti pananganamong ti Dios. Ket nasken a mariknatayo ti panagkasapulan a mangted iti pangatur a pammagbaga, mariknada ti ayattayo ken ti ayat ti Dios iti daytoy, saan a panangungget wenno panangumsi, a mangpalubos ken ni Satanas a mangyadayo kadakuada.

Ti pagwadan a kangrunaan a kasapulanda manipud kadayo ket ti panangaramid iti no ania ti nasken nga aramidenda. Nasken nga ikararagantayo dagiti sagsagut ti Espiritu. Nasken nga agutobtayo kadagiti nasantuan a kasuratan ken kadagiti balikas dagiti sibibiag a propeta. Nasken nga agaramidtayo kadagiti plano a saan laeng a tarigagay no di katulagan. Ket kalpasanna nasken a tungpalentayo dagiti karitayo iti Apo. Ken nasken a paregtaentayo dagiti dadduma babaen ti panangibinglaytayo kadakuada dagiti bendision ti Pannubbot a dimtengen iti biagtayo.

Ken nasken nga ipagwadantayo iti bukodtayo a biag ti natibker ken agtultuloy a kinapudno a namnamaen ti Apo kadakuada. Bayat ti panangaramidtayo, matulongantayo ida a makarikna manipud iti Espiritu iti pammatalged a no mangipettengdanto, mangngegandanto dagiti balikas ti maysa a managayat a Mangisalakan ken Nailangitan nga Ama: “Naimbag, adipen a nalaing ken mapagtalkan: mapagtalkanka

iti bassit, isaadkanto nga agaywan iti adu: makipagragasakka iti Apom.”⁴ Ket datayo a mangtulong kadakuada iti dalanda ket mangngegantayo dagita a balikas a sirarag-o.

Paneknekak nga ay-ayatennakayo ti Apo ken ti tunggal anak ti Dios. Daytoy ti pagarianna, a naisubli nga addaan kadagiti tulbek ti priesthood babaen ken ni Propeta Joseph Smith. Ni Thomas S. Monson ti propeta ti Apo ita. Ikarik iti tunggal maysa kadakayo, bayat ti panangsurotyo iti naparegta a pangiturong iti daytoy, ti pudno a Simbaan ni Jesucristo, a dagiti agtutubotayo ken datayo a mangtulong ken mangipateg kadakuada ket maiyeg a sitatalged iti pagtaengantayo nga adda ti Nailangitan nga Ama ken ti Mangisalakan a makipagnaed kadagiti familia ken iti rag-o iti agnanayon. Iti nagan ni Jesucristo, amen.

DAGITI NAGADAWAN

1. 3 Nephi 14:13–14.
2. Thomas S. Monson, “To Learn, to Do, to Be,” *Liabona*, Nob. 2008, 67.
3. *Young Women Personal Progress* (booklet, 2009), 6.
4. Mateo 25:21.